



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Compendiolvm Vitæ Admirabilis Et Pretiosæ Mortis B.  
Rosæ De S. Maria Limensis Peruanæ, Tertii Ordinis S. P.  
Dominici à S. D. N. Clemente IX. Beatis Annumeratæ**

**González de Acuña, Antonio**

**Augustæ Vindellicorum, 1668**

Capvt III. Rosa, ut sequatur vestigia sanctæ Catharinæ Senensis, Tertio S.  
P. Dominici Ordini adscrib[i]tur.

**urn:nbn:de:hbz:466:1-44063**

## CAPVT III.

ROSA, ut sequatur vestigia sanctæ Catharinæ Senensis, Tertio S. P. Dominici Ordini adscribitur.

Qui sanctissimam Virginem Catharinam Senensem cum Rosa nostra componat, incertus animi sit, indicumne hunc florem, an ex Italia translatum in Peruviam dicat; usque adeo Rosa Catharinæ institutum vitæ, mores integerrimos, benevolentissimi Numinis dona, & ipsa tandem lineamenta vultus expressit. Conubij, cui nobili, & honestissimo destinabatur, spem amputare visa est excidio capillorum. Sed egregia formæ venustas, acre iudicium, suavitas erectæ indolis, elegantissimi mores sancto Virginis consilio adversabantur. Roseum illa candorem jejunijs deterere, nativam pulcherrimi vultus gratiam omni arte abolere, manus, quarum candor, & pulchritudo commendabatur viva calce amburere, ne hominum placeret obtutibus, domi latere; adeo ut aliquando Cantam deducta, locum metalli fodinis nobilem, quadriennio nunquam pedem extra limen extulerit, ne semel quidem videre dignata vicinū deliciarum hortum, aut percelebre spectaculum molium indicarum. Plures nihilominus invita accendit ambitu honestissimi thalami, ac præcipuo Matrona genere, & opibus clara illā uni-

eo filio suo Sponsam optabat, & gratissimum  
 hoc erat Rosæ parentibus, ac fratribus, qui nu-  
 ptiarum nomine exanimatam, probris, convi-  
 ciis, alapis, calcibus impetebant, veluti Lapa Ma-  
 ter S. Catharinam, cujus ad instar Rosa injuriis  
 omnibus æquissimo animo devoratis, in S. Do-  
 minici viridarium tandem insita fuit, adscripta  
 Tertiæ sanctissimi Patris familiæ, licet illam in-  
 vitassent cœnobium nobilissima, optarat S. Archi-  
 episcopus Turibius, ab illa præcipuè sacra do-  
 mus, quæ tunc surgebat, fundamenta poni, Ro-  
 sa studiosa sequi Seraphicæ Magistræ suæ Catha-  
 rinæ Senensis Idæam, quam quinquennis elegerat,  
 vitæ instituto, moribus, habitu repræsen-  
 tandam, ne tamen suo consilio nimium tri-  
 buere, & parùm sapientum virorum arbitrio vi-  
 deretur, in viam se aliquando dederat Sanctissi-  
 mæ Incarnationis Monasterium ingressura. At  
 cum ultimum vale diceret Rosariano Sacello  
 Deiparæ, visa est ut rupes adnasci solo, & frustra  
 in pedes exilire tentavit, advocato sæpius ad o-  
 pem ferendam germano fratre, contentisque  
 viribus conniso; quoadusque decreto regressu  
 ad domesticas latebras, alacritate missa surre-  
 xit. Et alio prodigio Deus ad premenda Ca-  
 tharinæ vestigia Rosam invitavit; nam ex papi-  
 lionibus, qui colorum varietate mirabiles Li-  
 manum agrum pervolitant, unus nigro tan-  
 tum, alboque colore pulcherrimè striatus, cir-  
 cumvolitavit Rosam, quæ divinum hoc esse re-  
 spon-

sponsum intellexit, ut velut animo dudum agitaverat, Prædicatorij Ordinis tertium habitum amplecteretur. Ab illo semel induto vix non dimovit Rosam modestissimi animi demissio; nam gliscente ejus nominis celebritate, cœpit monstrari digitis, notari oculis, laudari à prætereuntibus, ipsique D. Catharinæ Senensi non rarò comparari. Et meritò; nam adeò sanctæ Magistræ suæ virtutes induit, ut semel tacitè miranti Confessario visa fuerit specie, vultu, lineamentis sic transformata, ut viva similitudine ipsissimam S. Catharinæ Senensis effigiem referret. Demum, quæ tam caro illi steterat, vestem constanter retinuit; nam dum latendi studium illam seponendam suggerebat, ad aram Sanctissimi Rosarij flexis humi genibus inter orandum placidissimo animi deliquio sensim dirigit, visa ab adstantibus primò exalbescere pallore niveo, mox decora suffusione rubescere, demum toto vultu lucescere, ac scintillatim radiare: suoque colori reddita, erumpentibus ex animo prægestiente verbis, ostendit, se in hoc vitæ instituto divinitus confirmatam.



CAP.